



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ԲՈՂՈՔԱՐԿՄԱՆ ԽՈՐՀՈՒՐԴ

ք. Երևան

15.09.2017թ.

Ո Ր Ո Շ ՈՒ Մ

ՀՀ գնումների բողոքարկման խորհրդի

թիվ ՍՑ-ԷՍ-2017/32

Հայաստանի Հանրապետության գնումների բողոքարկման խորհրդուրդը (այսուհետ՝ նաև Խորհուրդ) ուսումնասիրելով Հայաստանի Հանրապետության ֆինանսների նախարարության կողմից 22.08.2017թ. թիվ 03/26-3/15290-17 գրությամբ «Պավել և Ընկերներ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված պաշտոնական ընթացակարգով ներկայացված հիմքերը, պարզեց հետևյալը.

1. ՀՀ ֆինանսների նախարարության ներկայացրած փաստերը և պահանջը.

ՀՀ ֆինանսների նախարարությունը, ՀՀ առողջապահության նախարարության 22.08.2017թ. թիվ ՆՁ/10549-17 գրության հիման վրա, 22.08.2017թ. ՀՀ գնումների բողոքարկման խորհրդում նախաձեռնել է «Պավել և Ընկերներ» ՍՊԸ-ին (այսուհետ՝ նաև Ընկերություն) գնումների գործընթացին մասնակցելու իրավունք չունեցող մասնակիցների ցուցակում (այսուհետ՝ նաև Ցուցակ) ներառելու պաշտոնական ընթացակարգ:

Խորհրդում նախաձեռնված պաշտոնական ընթացակարգի քննության նպատակով տեղի ունեցած նիստին մասնակցում էր ՀՀ ֆինանսների նախարարությանը լիազորված ներկայացուցիչ Արթուր Բաղդասարյանը:

2. ՀՀ առողջապահության նախարարության «Հիվանդությունների վերահսկման և կանխարգելման կենտրոն» ՊՈԱԿ-ի ներկայացրած փաստարկները և դիրքորոշումը.

ՀՀ առողջապահության նախարարությունը 22.08.2017թ. թիվ Ն2/10549-17 գրությամբ դիմել է ՀՀ ֆինանսների նախարարությանը՝ հայտնելով հետևյալը.

««Հիվանդությունների վերահսկման և կանխարգելման կենտրոն» ՊՈԱԿ-ի (այսուհետ՝ նաև Պատվիրատու) կողմից ս.թ. օգոստոսի 3-ին սեղմված բնական գազի ձեռքբերման նպատակով կազմակերպված N «ԳՀԱՊՁԲ-ՀՎԿԱԿ-2017-17» ծածկագրով գնման ընթացակարգին մասնակցել է «Պավել և Ընկերներ» ՍՊԸ-ն:

Հայտերի բացման նիստում «Պավել և Ընկերներ» ՍՊԸ-ի հայտը գնահատվել է բավարար, և հիմք ընդունելով մասնակիցների ներկայացրած գնային առաջարկները՝ «Պավել և Ընկերներ» ՍՊԸ-ն 2-րդ չափաբաժնի մասով հայտարարվել է առաջին տեղ զբաղեցրած մասնակից:

ՀՀ կառավարության 04.05.2017 թ. N526-Ն որոշմամբ հաստատված «Գնումների գործընթացի կազմակերպման» կարգի 43-րդ կետի 3-րդ ենթակետով նախատեսված տվյալների ճշտման նպատակով ս.թ. օգոստոսի 4-ին Հայաստանի Հանրապետության կառավարությանն առընթեր պետական եկամուտների կոմիտե ուղարկված հարցմանն ի պատասխան՝ 11.08.2017 թ. ստացված եզրակացության համաձայն՝ «Պավել և Ընկերներ» ՍՊԸ-ն ունեցել է 147 026 ՀՀ դրամի չափով ժամկետանց հարկային պարտավորություն:

Հանձնաժողովը «Գնումների գործընթացի կազմակերպման» կարգի 44-րդ կետով ս.թ. օգոստոսի 11-ին հայտերի գնահատման արդյունքների ամփոփման նիստում «Պավել և Ընկերներ» ՍՊԸ-ի հայտը մերժել է»:

Խորհրդում նախաձեռնված պաշտոնական ընթացակարգի քննության նպատակով տեղի ունեցած նիստերին մասնակցում էր ««Հիվանդությունների վերահսկման և կանխարգելման կենտրոն» ՊՈԱԿ-ի լիազորված ներկայացուցիչ Սիրանույշ Պապիկյանը:

3. «Պավել և Ընկերներ» ՍՊԸ-ի ներկայացրած փաստարկները և դիրքորոշումը.

Ընկերությունը Խորհրդին ուղղված գրությամբ հայտնել է հետևյալը.

«Պավել և Ընկերներ» ՍՊԸ-ն ս.թ. ապրիլ ամսին ունեցել է ժամկետանց պարտքեր, ընդ որում՝ ԱԱՀ-ի 10%-5.753 դրամ, շահութահարկի 10%-21.981 դրամ և եկամտային հարկի 10%-119.289 դրամ, ընդամենը՝ 147.023 դրամի: Ընկերությունը ս.թ. ապրիլի 28-ին կատարել է վճարումներ «Ակբա-Կրեդիտ Ագրիկոլ Բանկի» Մարտունու մասնաճյուղում՝ վերը նշված պարտավորությունները մարելու համար՝ վստահ լինելով, որ պարտավորություններն արդեն մարված են:

Ստանալով Ձեր հիշյալ գրությունը՝ պարզեցինք, որ նշված վճարումները բանկի կողմից տեխնիկական պատճառներով փոխանցվել են ոչ թե մեր նշված հարկատեսակների հաշվեհամարներին, այլ ԱԱՀ-ի, շահութահարկի և եկամտային հարկի հաշվեհամարներին:

Արդյունքում մինչև 03.08.2017թ.ԱԱՀ-ի, շահութահարկի և եկամտային հարկի մասով ունեցել ենք գերավճարներ, իսկ ԱԱՀ-ի 10%, շահութահարկի 10% և եկամտային հարկի 10% չափով պարտքեր, որոնք, մեր կարծիքով, ՏՀՏ-ի կողմից վաղուց հնարավոր էր հաշվանցել: 14.08.2017թ. երկրորդ անգամ վճարելուց հետո ԱԱՀ-ի 10%, շահութահարկի 10% և եկամտային հարկի 10% ժամկետանց պարտքերը մարվեցին»:

Խորհրդում նախաձեռնված պաշտոնական ընթացակարգի քննության նպատակով տեղի ունեցած նիստերին մասնակցում էր Ընկերության տնօրեն Բարսեղ Դարբինյանը և իրավաբան Հակոբ Ալեքսանյանը:

4. ՍՑ-ԷՍ-2017/32 պաշտոնական ընթացակարգի քննության համար էական նշանակություն ունեցող փաստերը, Խորհրդի հիմնավորումները և եզրահանգումը.

Խորհուրդն ուսումնասիրել է ՀՀ ֆինանսների նախարարության կողմից 22.08.2017թ. թիվ 03/26-3/15290-17 գրությունը և կից փաստաթղթերը, ՀՀ առողջապահության նախարարության 22.08.2017թ. թիվ ՆՁ/10549-17 գրությունը, «ԳՀԱՊՁԲ-ՀՎԿԱԿ-2017-17» ծածկագրով գնման ընթացակարգի հրավերը (այսուհետ՝ նաև Հրավեր), «Պավել և Ընկերներ» ՍՊԸ-ի ներկայացված հայտը, «ԳՀԱՊՁԲ-ՀՎԿԱԿ-2017-17» ծածկագրով գնման ընթացակարգի գնահատող հանձնաժողովի (այսուհետ՝ նաև Հանձնաժողով) 03.08.2017թ. նիստի թիվ 2, 10.08.2017թ. նիստի թիվ 3, 11.08.2017թ.

նիստի թիվ 4 արձանագրությունները, Հայաստանի Հանրապետության կառավարությանն առընթեր պետական եկամուտների կոմիտեին (այսուհետ՝ նաև Կոմիտե) 04.08.2017թ. կատարված հարցումը, Կոմիտեի կողմից 10.08.2017թ. ներկայացված եզրակացությունը, Կոմիտեի կողմից 03.02.2017թ. «Պավել և Ընկերներ» ՍՊԸ-ի՝ բյուջեի հետ փոխհարաբերությունների և հարկային մարմնի կողմից վերահսկվող ՀՀ օրեսդրության առանձին պահանջների կատարման ճշտության ստոգման արդյունքները, Ընկերության կողմից եկամտային հարկի, ԱԱՀ-ի և շահութահարկի մարման նպատակով կատարված վճարումների բանկային անդորրագրերի պատճենները, Պատվիրատուի կարծիքը և դիրքորոշումը.

«Հիվանդությունների վերահսկման և կանխարգելման կենտրոն» ՊՈԱԿ-ի կողմից 03.08.2017թ. սեղմված բնական գազի ձեռքբերման նպատակով կազմակերպված N «ԳՀԱՊՁԲ-ՀՎԿԱԿ-2017-17» ծածկագրով գնանշման հարցման ընթացակարգին (այսուհետ նաև՝ ընթացակարգ) մասնակցության հայտ է ներկայացրել «Պավել և Ընկերներ» ՍՊԸ-ն՝ 2-րդ չափաբաժնի մասով:

Ընկերությունը ընթացակարգին մասնակցելու նպատակով ներկայացված հայտի N2 հավելվածով՝ ընթացակարգին մասնակցելու նպատակով հրավերով սահմանված մասնակցության իրավունքի պահանջներին համապատասխանելու մասին հայտարարությամբ, հայտարարել և հավաստել է, որ բավարարում է «ԳՀԱՊՁԲ-ՀՎԿԱԿ-2017-17» ծածկագրով գնանշման հարցման հրավերով սահմանված մասնակցության իրավունքի պահանջներին:

Հանձնաժողովի 03.05.2017թ. ժամը 11:00-ին կայացած նիստի N 2 արձանագրության 1.5 կետով որոշել է ընթացակարգի 2-րդ չափաբաժնով «Պավել և Ընկերներ» ՍՊԸ-ին ճանաչել որպես առաջին տեղն զբաղեցրած մասնակից:

Նույն արձանագրության 2.2 կետով Հանձնաժողովը որոշել է Հայաստանի Հանրապետության կառավարությանն առընթեր պետական եկամուտների կոմիտեին ներկայացնել հարցում՝ ընթացակարգի առաջին տեղն զբաղեցրած մասնակիցների՝ Հայաստանի Հանրապետության պետական բյուջեի նկատմամբ հայտը ներկայացնելու օրվա դրությամբ ժամկետանց հարկային պարտավորությունների, ինչպես նաև Ֆինանսական միջոցների առկայության վերաբերյալ:

Հանձնաժողովը 04.08.2017թ. Կոմիտեին ուղարկել է հարցում՝ խնդրելով տարամադրել «Պավել և Ընկերներ» ՍՊԸ-ի՝ 02.08.2017թ. դրությամբ ՀՀ կառավարության 2017թ. մայիսի 4-ի N 526-Ն որոշմամբ հաստատված «Գնումների գործընթացի կազմակերպման» կարգի (այսուհետ՝ Կարգ) 43-րդ կետի 3-րդ մասով նախատեսված տվյալների վերաբերյալ տեղեկատվություն:

Կոմիտեի կողմից 10.08.2017թ., այն է՝ Կարգի 44-րդ կետով սահմանված ժամկետից մեկ աշխատանքային օր ուշացումով, տրամադրված եզրակացության համաձայն՝ «Պավել և Ընկերներ» ՍՊԸ-ն հայտը ներկայացնելու օրվա դրությամբ ՀՀ պետական բյուջեի նկատմամբ ունեցել է 147,026 ՀՀ դրամի չափով ժամկետանց հարկային պարտավորություն:

«ԳՀԱՊԶԲ-ՀՎԿԱԿ-2017-17» ծածկագրով գնանշման հարցման ընթացակարգին «Պավել և Ընկերներ» ՍՊԸ-ի կողմից ներկայացված գնային առաջարկը կազմել է 300,000 ՀՀ դրամ:

Հանձնաժողովը 11.08.2017թ. ժամը 15:30-ին կայացած նիստի թիվ 6 արձանագրության 2.2 կետով որոշել է մերժել «Պավել և Ընկերներ» ՍՊԸ-ի հայտը՝ վերջինիս կողմից Հայաստանի Հանրապետության պետական բյուջեի նկատմամբ հայտը ներկայացնելու օրվա դրությամբ ժամկետանց հարկային պարտավորություններ ունենալու հիմնավորմամբ:

ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի՝

- 32-րդ կետի 1-ին ենթակետի «բ» պարբերության համաձայն՝ մասնակիցը հայտով ներկայացնում է իր կողմից հաստատված հայտարարություն՝ հրավերով սահմանված մասնակցության իրավունքի և որակավորման չափանիշներին իր համապատասխանության մասին,

- 43-րդ կետի 3-րդ ենթակետի համաձայն՝ հայտերի բացման նիստի ավարտին հաջորդող աշխատանքային օրը հանձնաժողովի քարտուղարն էլեկտրոնային փոստի միջոցով Հայաստանի Հանրապետության կառավարությանն առընթեր պետական եկամուտների կոմիտե (այսուհետ՝ կոմիտե) հարցում է ներկայացնում առաջին տեղն զբաղեցրած մասնակցի՝ հայտը ներկայացնելու օրվա դրությամբ հարկային մարմնի

կողմից վերահսկվող եկամուտների գծով ժամկետանց պարտավորությունների, ինչպես նաև ինչպես նաև հրավերով «ֆինանսական միջոցներ» որակավորման չափանիշի գնահատման համար սահմանված պայմանների առկայության վերաբերյալ՝ ներկայացնելով մասնակցի անվանումը և հարկ վճարողի հաշվառման համարը.

- 44-րդ կետի համաձայն՝ կոմիտեն նույն կարգի 43-րդ կետի 3-ին ենթակետով նախատեսված հարցումն ստանալու օրվան հաջորդող երկու աշխատանքային օրվա ընթացքում էլեկտրոնային եղանակով պատվիրատուին տրամադրում է հարցման մասին տեղեկատվություն: Եթե կոմիտեի կողմից սահմանված ժամկետից ուշ ներկայացված տեղեկատվությամբ արձանագրվում է, որ առաջին տեղն զբաղեցրած մասնակիցը հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունեցել է օրենքով նախատեսված շեմը գերազանցող ժամկետանց պարտավորություններ կամ չի բավարարում հրավերով «ֆինանսական միջոցներ» որակավորման չափանիշի պահանջները, և պայմանագիրը կնքված չէ, ապա տվյալ մասնակցի հայտը մերժվում է: Եթե սահմանված ժամկետում տրամադրված տեղեկատվության արդյունքում մասնակցի ներկայացրած հայտարարությունը որակվում է իրականությանը չհամապատասխանող, ապա հայտերի գնահատման նիստում հանձնաժողովի որոշմամբ տվյալ մասնակցի հայտը մերժվում է՝ անկախ մասնակցի կողմից կոմիտեի տրամադրած տեղեկատվությունից տարբերվող տեղեկատվություն ներկայացվելու հանգամանքից:

- 45-րդ կետի համաձայն՝ Օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու օրվան հաջորդող հինգ աշխատանքային օրվա ընթացքում պատվիրատուն տվյալ մասնակցի տվյալները՝ համապատասխան հիմքերով, գրավոր ուղարկում է լիազորված մարմին, որը դրանք ստանալուն հաջորդող 5 աշխատանքային օրվա ընթացքում գրավոր տրամադրում է գնումների բողոքարկման խրոհորդին: Նույն կարգի 44-րդ կետով սահմանված՝ մասնակցության իրավունք չունենալու հիմքերի առկայության դեպքում նույն կետով նախատեսված տվյալները չեն ներկայացվում լիազորված մարմին, եթե մասնակիցը կամ կոմիտեն լրացուցիչ տեղեկատվությունը ներկայացրել է մինչև հայտերի գնահատման արդյունքների հաստատման նիստին հաջորդող երրորդ աշխատանքային օրը:

«Հիվանդությունների վերահսկման և կանխարգելման կենտրոն» ՊՈԱԿ-ի կողմից սեղմված բնական գազի ձեռքբերման նպատակով կազմակերպված N «ԳՀԱՊՁԲ-ՀՎԿԱԿ-2017-17» ծածկագրով գնանշման հարցման հրավերի 1-ին մասի՝

- 8.12 կետի 3-րդ ենթակետի համաձայն՝ հանձնաժողովի քարտուղարը հայտերի բացման նիստի ավարտին հաջորդող աշխատանքային օրը՝ էլեկտրոնային փոստի միջոցով Հայաստանի Հանրապետության կառավարությանն առընթեր պետական եկամուտների կոմիտե (այսուհետ՝ կոմիտե) հարցում է ներկայացնում առաջին տեղ զբաղեցրած մասնակցի՝ հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ժամկետանց պարտավորությունների, ինչպես նաև նույն հրավերի 1-ին մասի 2.5 կետով նախատեսված՝ «ֆինանսական միջոցներ» որակավորման չափանիշի գնահատման համար սահմանված պայմանների առկայության վերաբերյալ՝ ներկայացնելով մասնակցի անվանումը և հարկ վճարողի հաշվառման համարը: Ընդ որում նույն ենթակետում հարցումն ուղարկվում է Ashkhen_Papoyan@taxservice.am էլեկտրոնային փոստի հասցեին նույն հրավերի 8-րդ հավելվածով նախատեսված ձևին համապատասխան՝ էլեկտրոնային նամակի պատճենները միաժամանակ ուղարկելով Lusine_Ghahramanyan@taxservice.am և procurement@minfin.am էլեկտրոնային փոստի հասցեներին.

- 8.14 կետի համաձայն՝ կոմիտեն նույն հրավերի 1-ին մասի 8.13 կետի 3-րդ ենթակետով նախատեսված հարցումն ստանալու օրվանից երեք աշխատանքային օրվա ընթացքում էլեկտրոնային փոստի միջոցով պատվիրատուին տրամադրում է հարցման մասին նույն հրավերի 9-րդ հավելվածով նախատեսված ձևին համապատասխան տեղեկատվություն: Նույն կետով սահմանված ժամկետում կոմիտեից տեղեկատվության չստացման դեպքում մասնակցի ներկայացրած հայտարարությունները համարվում են իրականությանը համապատասխանող: Եթե կոմիտեի կողմից սահմանված ժամկետից ուշ ներկայացված տեղեկատվությամբ արձանագրվում է, որ առաջին տեղ զբաղեցրած մասնակիցը հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունեցել է Օրենքով նախատեսված շեմը գերազանցող ժամկետանց պարտավորություններ կամ չի բավարարում նույն հրավերով «ֆինանսական միջոցներ» որակավորման չափանիշի պահանջներին և պայմանագիրը

կնքված չէ, ապա տվյալ մասնակցի հայտը մերժվում է: Եթե սահմանված ժամկետում տրամադրված տեղեկատվության արդյունքում մասնակցի ներկայացրած հայտարարությունը որակվում է իրականությանը չհամապատասխանող, ապա հայտերի գնահատման նիստում հանձնաժողովի որոշմամբ տվյալ մասնակցի հայտը մերժվում է՝ անկախ մասնակցի կողմից կոմիտեի տրամադրված տեղեկատվությունից տարբերվող տեղեկատվություն ներկայացվելու հանգամանքից: Նույն կետով նախատեսված որակավորման չափանիշի գնահատման ժամանակ հաշվի է առնվում նույն հրավերի 1-ին մասի 8.20 կետի 2-րդ ենթակետով նախատեսված ընթացակարգը:

Ընկերությունը Խորհրդին է ներկայացրել ՀՀ ԿԱ պետական եկամուտների կոմիտեի կողմից Կոմիտեի կողմից 03.02.2017թ. իրականացված «Պավել և Ընկերներ» ՍՊԸ-ի՝ բյուջեի հետ փոխհարաբերությունների և հարկային մարմնի կողմից վերահսկվող ՀՀ օրենսդրության առանձին պահանջների կատարման ճշտության ստուգման արդյունքներ վերաբերյալ տեղեկանքը, ինչպես նաև գրություն, որով փաստել է, որ «Պավել և Ընկերներ» ՍՊԸ-ն 2017թ. ապրիլ ամսին ունեցել է ժամկետանց հարկային պարտավորություններ ԱԱՀ-ի, շահութահարկի և եկամտային հարկի 10%-ի մասով, ընդամենը՝ 147.023 դրամի:

Պաշտոնական ընթացակարգի քննության նպատակով Խորհրդում տեղի ունեցած նիստին Ընկերության ներկայացուցիչը հայտնել է, որ 28.04.2017թ. կատարել է վճարումներ «Հայէկոնոմբանկ» ԲԲԸ-ի «Մարտունի» մասնաճյուղում՝ վերը նշված պարտավորությունները մարելու նպատակով՝ վստահ լինելով, որ մարել է առկա պարտավորությունները: Սակայն, հետագայում պարզվել է, որ նշված վճարումները բանկի աշխատակցի կողմից տեխնիկական վրիպման պատճառով փոխանցվել են ոչ թե Ընկերության նշված հարկատեսակների հաշվեհամարներին, այլ ԱԱՀ-ի, շահութահարկի և եկամտային հարկի հաշվեհամարներին:

Միաժամանակ, Ընկերությունը Խորհրդին է ներկայացրել կատարված վճարումների հանձնարարագրերի պատճենները, որոնց ուսումնասիրությունից պարզվել է, որ Կոմիտեի կողմից տրված եզրակացության համաձայն՝ 147.000 ՀՀ դրամ՝ գումարի չափով ժամկետանց պարտավորությունը Ընկերությունը մարելու նպատակով 28.04.2017թ. կատարել է վճարումներ՝ 120,000 ՀՀ դրամի, 6,000 ՀՀ դրամի և 22,000 ՀՀ դրամի՝

համապատասխանաբար եկամտային հարկի 10%, ԱԱՀ-ի 10% և շահութահարկի 10%՝ ընդհանուրը 148.000 ՀՀ դրամ գումարի չափով, սակայն բանկի աշխատակցի կողմից միայն ԱԱՀ-ի 10% ժամկետանց պարտավորության մարման նպատակով կատարված փոխանցման վճարման հանձնարարագրի վրա է կատարվել համապատասխան նշումը:

Այսպիսով, Խորհուրդն արձանագրում է, որ «Պավել և Ընկերներ» ՍՊԸ-ի ընթացակարգին մասնակցելու նպատակով հայտը ներկայացնելու օրվա՝ 02.08.2017թ. դրությամբ հարկային մարմնի կողմից վերահսկվող եկամուտների գծով՝ Ընկերության կողմից ներկայացրած գնային առաջարկի մեկ տոկոսը գերազանցող ժամկետանց պարտավորությունն առաջացել է Ընկերության կողմից նշված պարտավորությունների մարմանն ուղղված վճարումն ընդունող բանկի աշխատակցի վրիպման հետևանքով, որը Ընկերությունը չէր կարող կանխատեսել:

«Գնումների մասին» ՀՀ օրենքի (այսուհետ՝ նաև Օրենք) 6-րդ հոդվածի՝

- 1-ին մասի 2-րդ կետի համաձայն՝ գնումների ընթացակարգերին մասնակցելու իրավունք չունեն անձինք, որոնք հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունեն իրենց ներկայացրած գնային առաջարկի մինչև մեկ տոկոսը, բայց ոչ ավելի, քան հիսուն հազար Հայաստանի Հանրապետության դրամը գերազանցող ժամկետանց պարտավորություններ.

- 2-րդ մասի համաձայն՝ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը պաշտոնական ընթացակարգ է նախաձեռնում գնումների բողոքարկման խորհրդում՝ առանց վճարի: Տվյալ մասնակցի կարծիքը լսելուց հետո գնումների բողոքարկման խորհուրդը որոշում է կայացնում մասնակցին նույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

Հաշվի առնելով վերոգրյալը՝ Խորհուրդը գտնում է, որ «Պավել և Ընկերներ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու հիմքեր առկա չեն:

Ելնելով վերոգրյալից և ղեկավարվելով «Գնումների մասին» ՀՀ օրենքի 6-րդ հոդվածի 2-րդ մասով, 50-րդ հոդվածի 7-րդ մասի 2-րդ կետով՝ ՀՀ գնումների բողոքարկման խորհուրդը


Ո Ր Ո Շ Ե Ց

ՀՀ ֆինանսների նախարարության կողմից 22.08.2017թ. «Պավել և Ընկերներ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով Խորհրդում նախաձեռնված պաշտոնական ընթացակարգը մերժել:

ՀՀ գնումների բողոքարկման խորհրդի որոշումն իրավապարտադիր է:

ՀՀ գնումների բողոքարկման խորհրդի որոշումը կարող է բողոքարկվել դատական կարգով:

**ՀՀ գնումների բողոքարկման
խորհրդի անդամ՝**



ԷՄԻԼ ՍԱՐԳՍՅԱՆ